

Arbeitstagung für Volksbühne, Buch und Bild

Autor(en): [s.n.]

Objektyp: **Article**

Zeitschrift: **Die Berner Woche**

Band (Jahr): **32 (1942)**

Heft 30

PDF erstellt am: **24.09.2024**

Persistenter Link: <https://doi.org/10.5169/seals-644920>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Arbeitstagung für Volksbühne, Buch und Bild

veranstaltet von der Bernischen Vereinigung für Heimatschutz und der Bernischen Trachtenvereinigung
in Konolfingen, 11. bis 13. Juli 1942

Us jedem Zug, wo am Samschtig z'Konolfinge ghalte het, isch es Tschüppeli Trachtelüt usgstige.

„Was isch ächt da wieder los?“; meint einen im Zug, wo sech es jungs Meitschi in ere Freudebärgertracht us em Gstungg usedrückt.

„Was anders ächt als scho wieder es Trachtfescht“, git der ander ume.

Das Mal het er lätz grate. — Ueberhaupt meine vieli geng no, wenn amenen Ort es paar Trachtmeistchi uf-touche, es syg es Fescht umewäg, e Jutzeten oder e Tanzete — 's isch äben anders!

Am Samschtig, Sunntig und Mändig sy d'Trachtelüt us em Bärnbiet z'Konolfinge zämecho, für z'schaffe. D'Ueberschrift „Arbeitstagung“ isch de nid öppe numen es Deckmänteli gsi für ne Juheiete; es isch ärscht und flyssig gschaffet worde.

Als erschi Trachtevereinigung het die Bärnisch das Jahr en Arbeitstagung für Dialäkttheater, Buech und Bild düregföhrt, will sie näbem Trachtewäsen, em Volkslied und -Tanz no meh im Programm het. Sie wott o erzieh, wott us ihrne Mitglieder rächti, sänkträchti Bärner mache, Lüt wo wüsse, für was sie da sy, wo d'Tracht nid alegé für drinne z'paradiere, söndere dermit zeige wei, was und wär sie sy, dass sie nid nume für ds Näh da sy, dass sie zu dene ghöre wo säge: „Bärnerland, Heimatland — da nimm mi“, wie's der Fritz Wanzeried eso träf gseit het.

Der Presidant vom Arbeitsusschuss, der Fritz Wanzeried, het die Arbeitsgemeinschaft am Samschtig am Viertel ab Zweu im „Chrütz“ gottwilche gheisse und het mit neren amächeligen Asprach die Arbeitstagung eröffnet.

Drufabe het der Leiter vo der Trachtgruppe Konolfinge, der Fritz Gribi, dargleit, *warum* dass mer überhaupt Theater spiele — (Theater spiele, nid Theaterlis mache) — und *was* mer spiele, und, was ds Wichtigschten isch, *wie* mer spiele wei.

Was und wie mer Theater spiele wei, hei nam Vortrag vom Fritz Gribi Chinder und Erwachseni us em Fankhis zeigt. Sie hei unter der Leitung vom Hans Dähler es Spiel vom Karl Uetz ufgföhrt, „Zwo Stube“. — Ja, das isch Theater gsi, wie mer's ha wei! Aebe nid „Theater“, sondern es Stück Läbe, won is wie ne lutere Spiegel vorghalte wird. Für guet und ächt chönne z'spiele, bruucht es o nes guets Täxtbuech. Und das vo Uetz Karis „Zwo Stube“ isch äben es guets. Sy wahri, prächtigi Truebersprach, mängisch fyn wie ne haardünni Saite, mängisch chäch wie ne buechige Chnüder, isch äbe nid „ersunne“, sie isch glost und ghört vo eim wo Ohre het für das und o ds lutere Härz derzue. Das isch es Byspiel gsi zu Fritz Gribis Vortrag, schöner nützi nüt!

Na nere Singstund mit em Fritz Wanzeried, hei sech die Trachtelüt im Dorf ume zum Nachtässe verteilt und sy am halbi Nüüni wieder binander gsässe, für z'luege, wie der Dokter Ständer vo Grosshöchstette mit Mitglieder vo der Trachtgruppe Konolfingen und vom Männerchor „Eintracht“ mit Byspiel und Gägebyspiel a Emil Balmers „Neue Wäg“ zeigt het, wie me's mache soll und was nid guet und nid im Sinn vo de Besträngunge vom Heimatschutz und vo de Trachtgruppen isch.

Am Sunntig isch die ganz Arbeitsgemeinschaft im Schloss Hünige z'Gascht gsi. — Scho am morgen am Siebni isch sie dert zuneren überus schönen und gfreute chlyne Morgefyr zämecho. — Wie weneli bruucht es doch, für so rächt z'gsppure, was eso imene früeche Julimorge cha lige! Zum Singe vo der Trachtgruppe, zu der schöne Musig und de Gotthälvorläsunge vom Fritz Gribi hei dussen im Park d'Finkli und d'Amsle gsungen und g'lärmiert: „Dihr syt de nid alei, dert inne! Mir wüssen o, wie schön dass' isch!“

Na der Predig, wo me mitenand bsuecht het, het e chlyni Usstellung i dreine Ruum vom Schloss für ds guete Bild

und ds guete Buech gworbe. Näbe de bekannte Bilder vom Werner Gfeller het me mit emene junge Konolfinger Maler chönne Bekantschaft mache. Er macht si, der Rysler Dene, wo ds Gäld nid hei für Originalbilder z'choufe, het me zeigt, dass e gueti, sorgfältig ygrahmeti Reproduktion e Stubeschmuck cha sy, wo me syr Läbtig cha Freud drann ha.

Am Namittag isch men im Freie gsässe und het z'ersch e Vortrag vom Karl Uetz glost. Er het über ds Buech im Buehus gredt. Und wie het er gredt! Hinden a de Muure vom Schloss het men es zarts Echo vo syr schöne, warme Stimm ghört, und es isch gsi, wie wenn syni Wort hindedy no rächt understriche würde. Mit Byspiel und Erfahrungen us sym egete Läbe het der Fankhisschuelmeischer syni Hörer im Bann ghalte. Er het dargleit, was üs es Buech cha sy, was mir in ihm finde chönne, wie mir i üsem Läben i Freud und Leid am guete Buech e Fründ und Hälfer hei.

Dass me drufaben uf e Werner Gfeller isch gspannet gsi, wo us Vaters Wärken en usgezeichneti Erzählung vorgläse het, versteit sech. Das het er guet gmacht, der Suhm vom Simon Gfeller. Wenn eine wär derby gsi, wo nüt ghört hätt und nume hätt chönne luege, er wär nid z'churz cho, er hätt die Gschicht em Werner chönnen am Gsicht ablase!

Nadäm am Morge scho der Werner Gfeller zu der Usstellung es paar Wort gseit het, isch am Namittag ds Thema „Das Bild im Bauernhaus“ a d'Reihe cho.

Nam z'Nacht hei sech d'Trachtelüt wieder im „Chrütz“ troffe, für no einisch e Demonstration vomene Regisseur z'gseh. Das Byspiel het de zeigt, wie me's grad nid mache soll — ömel im Dialäkttheater!

Am Mäntig am Morge het der Kari Grunder viel Interessants und Luschtigs über ds „Theater“ vor vierzig Jahrgwüss z'brichte. Ja, das sy no Zyte gsi, wo men a der „Braut von Hohenklingen“, der „Rose vom Oberland“ un anderne Schauerdrame wohlgläbt het!

Nachhär het d'Elise Boumgartner i ihrer schlichten und bescheidenen Art erzellt, warum dass sie Theaterstück schrybt, und wie sie als Büri überhaupt derzue cho isch.

Der Hans Dähler het uf der Bühni e Teil vo Karl Uetz „Spiel vom verlorne Suhm“ mit Trachtelüt düreg'arbeitet. Da het me de chönne gseh, was derby usluegt, wenn e Regisseur eso nen Ufgab rächt agryft. Was der Hans Dähler zeigt het, das verratet Liebi zur Sach und vor allem Chönne.

Das wo binere settigen Arbeit usechunt, isch äbe das, wo o der Heimatschutz und d'Trachtevereinigung wei.

Am früeche Namittag het me sech im Gmeindsaal vo der Chilche zuneren ydrucksvolle Fyrstund ygfunde. — Die isch ein yne, wohl! — Es wär schad, wenn me da läng und breit wetti drüber schrybe. Eso öppis muess men eifach sälber erlabe.

Mit ärschten und gmässene Schritten isch die Arbeitsgemeinschaft na der Schlussfyr still heigange.

Es jedes het öppis mit sech heitreit; viel heitreit! Nid nume ds Ghörten und ds Erläbte vo dene Tage, o der fescht und ehrlech Wille, mitz'hälfe, Boumeischer z'sy am Volk.


Z'Konolfinge sy keni Fähnen useghänt gsi. Still, aber um so ärschter het me gschaffet. Es hei nid emal alli Konolfinger gwüss, dass im Dorf öppis los isch. Mi het nüt usposunet, keni Feschtrede ghalte mit Blächmusigbegleitung. Was gredt worden isch, isch schlicht und wahr vo Härze cho und — z'Härze gange!

Jitz chönnt me liecht meine, das syg doch e trocheni Sach gsi, die Arbeitstagung. O nei! — Es het ja alben o Fyaben und Pouse gäh, wo me het chönne zämesitze, singen und brichte. Und wenn der Handörgeler einen ufgmacht het, hei sech d'Trachtelüt i bodeständige Volkstanz amüsiert. Wär no nid alli het chönne, het gnue gha mit Luege, vovägen e Volkstanz isch äben o zum Luegen öppis uverschant Schöns! ps.



Arbeitstagung der Bernischen Trachtenvereinigung

In Konolfingen fanden sich über das vergangene Wochenende ca. 200 Trachtenleute ein, um in einer zweieinhalbtägigen Arbeitstagung Volksbühne, Schrifttum und Bild ein vollgerüstet Mass Arbeit zu erledigen. Die Tagung bezweckte vor allem die Förderung unseres Volkstheaters. Unter Leitung der Regisseure Dr. W. Ständer, Hans Dähler, Erwin Sutter wurde auf der Bühne praktisch gearbeitet und an Hand von Beispielen und Gegenbeispielen gezeigt, welche Möglichkeiten dem kultivierten Volkstheater offenstehen. Ohne Schminke und Maske, aber gerade deshalb so ergreifend, wirkte das Spiel «Zwo Stube» von Karl Uetz, dargeboten von seinen Schülern. Es folgten sich Referate von Fritz Gribi und Karl Uetz. Von Kari Grunder vernahm man in launig heiteren Worten, wie man vor vierzig Jahren Theater spielte. Elisabeth Baumgartner erzählte in ihrer schlicht einfachen Art: «Warum ich Theaterstücke schreibe» — kurzum, es gab für die Trachtenleute viel zu lernen und zu sehen.



Oben: Fritz Wanzenried hilft wacker mitsingen

Links: Auch vom Oberhasli fanden sich Vertreterinnen in ihrer schmucken Tracht ein

(Photos Ed. Probst)



Oben: Fröhliche Gesichter fand man überall unter den Trachten. — In einer schlichten Feier sprach die Landesmutter zu den Trachtenleuten. — Unten: Praktische Arbeit am Regiebuch. Unter Leitung von Hans Dähler wird «Der verlornig Sohn» durchgearbeitet